

四庫全書

集部

欽定四庫全書

宋詩鈔卷十三

內閣中書舍人吳之振編

林逋和靖詩鈔

林逋字君復杭之錢塘人少孤力學刻志不仕結廬
西湖孤山真宗聞其名賜粟帛詔長吏歲時勞問臨
終詩有茂陵他日求遺稿猶喜曾無封禪書時人高
其志識賜謚和靖先生逋不娶無子所居多植梅畜

鶴泛舟湖中客至則放鶴致之因謂梅妻鶴子云其
詩平澹邃美而趣向博遠故辭主靜正而不露刺譏
梅聖俞謂詠之令人忘百事大數塞王孟之幽而攄
劉韋之逸歐陽文忠愛其詠梅花詩疎影橫斜一聯
謂前世未有此句黃涪翁則以雪後園林二語為勝
之益一取神韻一取意趣皆為傑句然知歐陽之所
賞者多知涪翁之所賞者少也所作雖夥未嘗留稿
或問之曰吾不欲取名于時況後世乎故所存百無

一二如當時稱其五言有草泥行郭索雲木叫鉤輶
句集中已不可得其他遺軼可知也

送牛秀才之山陽省兄

之子詠陟岡別我歲時晏後夜失羣鶴高天着行鴈楚
山遠近出江樹青紅間尊酒無足辭離愁滿行盼

和運使陳學士遊靈隱寺寓懷

山壑氣相合旦暮生秋陰松門韻虛籟鐸若鳴瑤琴舉
目羣狀動傾耳百慮沉按部既優游時此振衣襟泓澄

冷泉色寫我清曠心飄飄白猿聲答我雅正吟經臺復
丹井捫蘿嘗徧臨鶴蓋青霞映玉趾蒼苔侵溫顏煦槁
木真性馴幽禽所以仁惠政及物一一溲洒翰璘珣壁
返駕旃檀林回睨率堵峰天半千萬尋

上湖閒泛艤舟石函因過下湖小墅

平皋望不極雲樹遠依依及向扁舟泊還尋下瀨歸青
山連石埭春水入柴扉多謝提壺鳥留人到落暉

西湖舟中值雪

浩蕩彌空濶霏霏接水濱
舟移忽自却山近未全分
凍軫閒清泛溫鑪擁薄薰
悠然詠招隱何許款離羣

湖村晚興

滄洲白鳥飛山影落晴暉
映竹犬初吠弄船人各歸
水波隨月動林翠帶烟微
寺近疎鐘起蕭然還掩扉

湖山小隱

猿鳥分清絕林蘿擁翠微
步穿僧徑出肩搭道衣歸
水墅香醑熟烟崖早笋肥
功名無一點何要更忘機

園井夾蕭森紅芳墮翠陰
畫巖松鼠靜春塹竹鷄溪
歲課非無术家藏獨有琴
顏原遺事在千古壯開心
衡門鄰晚島環堵背寒岡
片月通蘿徑幽雲在石牀
客遊拋郭杜漁事擬滄浪
管樂非吾尚昂頭肯自方

小隱自題

竹樹遶吾廬清溪趣有餘
鶴閒臨水久蜂懶得花疎
酒病妨開卷春陰入荷鋤
嘗憐古圖畫多半寫樵漁

北山寫望

晚來山北景圖畫亦應非
村路飄黃葉人家濕翠微
樵當雲外見僧向水邊歸
一曲誰橫笛蒹葭白鳥飛

中峰

中峰一徑分盤折上幽雲
夕照前村見秋濤隔嶺聞
長松含古翠衰藥動微薰
自愛蘇門嘯懷賢事不羣

小圃春日

岸幘倚微風柴籬春色中
草長團粉蝶林暖墜青蟲
戴酒為誰子移花獨乃翁
於陵偕隱事清尚未相同

郊國避暑

柴門鮮人事氛垢頗相忘
愛彼林間靜復茲池上涼
託心時散帙遲客復攜觴
況有陶籬趣歸禽語夕陽

園廬秋夕

蘭社裊裊香開扉趣自長
寒烟宿壚落清月上林塘
意想殊為適形骸固可忘
援琴有餘興聊復寄吟觴

山村冬暮

衡茅林麓下春色已微茫
雪竹低寒翠風梅落晚香
樵

期多獨往茶事不全忙雙鷺有時起橫飛過野塘

山中冬日

殘雪照籬落空山無俗諠鷄寒懶下樹人晏獨開門
廢圃春榮動回塘霧氣昏誰家歲酒熟輟棹憶西村

旅館寫懷

垂成歸不得危坐對滄浪病葉驚秋色殘蟬怕夕陽
可堪疎舊計無復更剛腸的的孤峰意淡宵一夢狂

出曹州

詩懷動歎嗟驢立帽陰斜雨灤生新蘚茅簑夾舊槎午
烟昏獨店岡路透誰家幾日江南興扁舟泊岸沙

盱眙山寺

下傍盱眙縣山崖露寺門疎鐘過淮口一徑入雲根竹
老生虛籟池清見古源高僧佛經榻茶話到黃昏

留題李頔林亭

無琴枕鶴經盡日卧林亭啼鳥自相語幽人誰欲聽半
闌花籍白一徑草盤青何必對樽酒此中堪獨醒

翠微亭

在金陵清涼寺

亭在江干寺清涼更翠微
秋階響松子雨壁上苔衣絕
境長難得浮生不擬歸
旅懷何計是西崦又斜暉

臺城寺水亭

金井前朝事林僧問不知
綠苔欺破閣白鳥占閒池
清楚曾經晉荒唐直到隋
南廊一聲磬斜照獨凝思

淮甸南遊

幾許搖鞭興淮天晚景中
樹林兼雨黑草實着霜紅
膽

氣誰憐俠衣裝自笑戎寒威敢相掉獵獵酒旗風

聞葉初秀才東歸

高鴻多北向極目雨餘天春滿吳山樹人登汴水船吟
生千里月醉盡一囊錢肯便懷鄉邑時清復少年

病中謝馮彭年見訪

老去已多病況當梅雨時山空門自掩晝永枕頻移晚
燕巢猶濕新篁籜未披若非求仲至誰復問棲遲

將歸四明夜坐話別任君

酒酣相向坐別淚濕吟衣半夜月欲落千山人憶歸亂
塵終古在長瀑倚空飛明日重攜手前期易得違

和梅聖俞雪中同虛白上人見訪

湖上玩佳雪相將惟道林早烟村意遠春漲岸痕淡地
僻過三徑人閒試五禽歸橈有餘興寧復比山陰

和酬杜從事題壁

弭蓋入衡宇相看情獨淡蕭疎秋樹色老大故人心佳
話頻移晷清標幾拂襟寥然長卿壁題此比兼金

夏日寺居和酬葉次公

午日猛如焚清涼愛寺軒
鶴毛橫蘚陣蟻穴入莎根
社信題茶角樓衣笮酒痕
中餐不勞問荀菊淨盤鐫

送長吉上人

囊集暮雲篇行行肯廢禪
青山買未暇朱闕去隨緣
茗試幽人井香焚賈客船
淮流遲新月吟玩想忘眠

春日送袁成進士北歸

春潮上海門歸鴈遠行分
千里倦行客片帆還送君
酒

波欺碧草歌疊裏晴雲來歲東堂桂聊酬一戰勲

送史殿省典封州

馬援疏蠻邑銅標何可窮人烟時亦有海色自如空
髭髮梅分白旌旗瘴減紅惟應蒔藥罷埋照酒醪中

送王舍人罷兩浙憲赴闕

上問還旌節明廷勤冕旒清談傾綺席蠹簡壓歸舟
越俗今無訟閒田亦有秋公朝論爵賞當拜富民侯

送昱師赴請姑蘇

同載闔閭人衣囊覆氎巾新烟赤岸暝融雪太湖春鐘
遠移齋候香遲上定身當知舉如意寶地雨花頻

送皎師歸越

林間久離索忽忽望西陵靜戶初聞扣歸舟又說登野
烟含樹色春浪疊沙稜幸謝雲門路同尋苦未能

送越倅楊屯田赴闕

越中分治罷山水別來初詩景多留石船痕半載書野
程江樹遠公譙郡樓虛看塞嚴徐召清風滿直廬

送思齊上人之宣城

林嶺藹春暉程程入翠微
泉聲落坐石花氣上行衣
詩正情懷澹禪高語論稀
蕭閒水西寺駐錫莫忘歸

洞霄宮

大滌山相向華陽路暗通
風霜唐碣朽草木漢祠空
劒石苔花碧丹池水氣紅
幽人天柱側茅屋灑松風

寄思齊上人

松下中峰路懷師日日行
靜鐘浮野水溪寺隔春城
閣

掩茶烟晚廊迴雪溜清當期相就宿詩外話無生

寄吳肅秀才

時吳在天
王院夏課

肄業寄僧房暑天湖上涼竹風過枕簟梅雨潤巾箱引
步青山影供吟白鳥行明年重訪舊身帶桂枝香

寄清曉閣黎

前時春雪晴林壑趣彌清幾憶山陰講兼忘谷口耕樹
叢歸夕鳥湖影浸寒城還肯重相訪柴門掩杜蘅

寄孫仲簿公

低折滄洲簿無書整兩春馬從同事借妻怕罷官貧道
僻收閒藥詩高笑古人仍聞長吏奏表乞瑣廳頻

寄和昌符

家近太行居西歸壓一驢同儕多及第高論獨知書名
迹收藏徧公門請謁疎離愁不可寫蟬噪夕陽初

淮甸城居寄任刺史

擾擾非吾事溪居斷俗情石莎無雨瘦秋竹共蟬清劒
在慵閒拂詩難憶細評寥然獨檣枕淮月上山城

寄輦下傳神法相大師

禁寺諸供奉如師藝學稀粉輕昏古本羅重拆秋衣淨
顰生瓶暈連陰長竹圍算應支遁馬毛骨苦無肥

寄臨川司理趙時校書

遠宦風波隔歸期歲月頻天形孤鳥晚烟色大江春驛
路向江郭船檣留賈人高臺望不極空使鬢華新

贈崔少微

賢才負聖朝終日掩衡茅尚靜師高道甘貧絕俗交
曉

碑看壁壺蒸朮拾鄰梢却憶揚夫子勞勞事解嘲

贈胡介

妻兒終擬棄舊識盡名賢高節嫌趨世常流笑學仙金
方燒易得星度算來玄祗說尋山去相期已數年

宿洞霄宮

秋山不可盡秋思亦無垠碧澗流紅葉青林點白雲涼
陰一鳥下落日亂蟬分此夜芭蕉雨何人枕上聞

湖山小隱二首

道着權名便絕交一峰青翠濕衡茅莊生已憤鴟爲嚇
揚子休譏蜾蠃嘲滴滴藥泉來石竇霏霏茶藹出松梢
琴僧近借南薰譜且併閒工子細抄

閒搭綸巾擁縹囊此心隨分識興亡黑頭爲相雖無謂
白眼看人亦未妨雲噴石花生劒壁雨敲松子落琴牀
清猿幽鳥遥相呌數筆湖山又夕陽

湖上晚歸

卧枕船舷歸思清望中渾恐是蓬瀛橋橫水木已秋色

寺倚雲峰正晚晴翠羽濕飛如見避紅蕖香嫋似相迎
依稀漸近誅茅地鷄犬林籬隱隱聲

湖上初春偶作

梅花開盡臘亦盡晴暖便如寒食天春色半歸湖岸柳
人家多上郭門船文禽相並映短草翠潏欲生浮嫩烟
幾處酒旗山影下細風時已弄繁絃

西湖春日

爭得才如杜牧之試來湖上輒題詩春烟寺院敲茶鼓

夕照樓臺卓酒旗濃吐襟芳薰巘崿濕飛雙翠破連漪
人間幸有蓑兼笠且上漁舟作釣師

池上春日

一池春水綠於苔水上花枝竹間開芳草得時依舊長
文禽無事等閒來年顏近老空多感風雅含情苦不才
獨有浴沂遺想在使人終日此徘徊

西巖夏日

蕙帳蕭閒掩弊廬子真巖石坐來初為驚野鳥巢間乳

懶過隣僧竹裏居
新溜迸涼侵靜語
晚雲浮潤上殘書
何煩彊捉白團扇
一柄青松自有餘

夏日即事

石枕涼生菌閣虛
已應梅潤入圖書
不辭齒髮多衰病
所喜林泉有隱居
粉竹亞稍垂薄露
翠荷差影聚遊魚
北窓人在羲皇上
時為淵明一起予

隱居秋日

行藥歸來即杜門
嘯臺秋色背人羣
幽蟲傍草晚相映

遠水着烟寒未分高亢可能稱獨行窮空猶擬賴斯丈
過從好事今誰是自笑何如揚子雲

秋日湖西晚歸舟中書事

水痕秋落蟹螯肥閒過黃公酒舍歸魚覺船行沉草岸
犬聞人語出柴扉蒼山半帶寒雲重丹葉疎分夕照微
却憶清谿謝太傅當時未解惜蓑衣

溪居雜興六首

諸葛孔明謝安石畜經濟之才雖結廬南陽攜妓東

山未嘗不以平一字內躋致生民為意鄙夫則不然
胸腹空洞剪然無所存置但能行樵坐釣外寄心於
小律詩時或鏖兵景物衡門情味則倒睨二君而反
有得色凡所寓興輒成短篇總曰深居雜興詩六首
蓋所以狀林麓之幽勝攄凡格之閒曠且非敢求聲
於當世故援筆以顯其事云

隱居松籟細錚然何獨微之重碧鮮已被遠峰擎巘巘
更禁初月吐娟娟門庭靜極霖苔露籬援涼生裊菊烟

中有病夫披白搭瘦行清坐詠遺篇

四壁垣衣釣具腥已甘衡泌號沉冥伶倫近日無侯白
奴僕當時有衛青花月病懷看酒譜雲蘿幽信寄茶經
茅君使者蕭閒甚獨理叢毛向戶庭

薄夫何苦事姦姦一室琴書自解顏峰後月明秋嘯去
水邊林影晚樵還文章敢道長於古光景渾疑剩却閒
多少烟霞好猿鳥令人惆悵謝東山

冉冉秋雲抱嘯臺一丘松竹是閒媒誰聞濟北傳兵略

枉說山東出相才樵褐短長披搥膝丹爐高下壘懸胎
三千功行無圭角可望虛皇九錫來

上書可有三千牘下筆曾無一百函閒卷孤懷背塵世
獨營幽事傍雲巖僧分乳食來陰洞鶴觸茶薪落靈杉
未似周顒少貞勝北山應免略相銜

松竹封侯尚未尊石為公輔亦云云清華自合論閒客
玄墨何妨事靜君鶴料免慚尸厚祿茶功兼擬策元勲
幽人不作山中相且擁圖書卧白雲

雜興四首

短褐蕭蕭頂幅巾，擁書纔罷即頻呻。
耕樵可以居山者，飲饌長如病酒人。
閉戶不無慵答客，焚香除是靜朝真。
前賢風槩聊希擬，一刺偏多井大春。

散帙揮毫總不忤，病懷愁緒坐相兼。
苔痕作意生秋壁，樹影無端上古簾。
一壑等閒甘汨汨，五門平昔避炎炎。
惟應數刻清涼夢，時曲顏肱興未厭。

湖上山林畫不如，霜天時候屬園廬。
梯斜晚樹收紅柿，

簡直寒流得白魚石上琴尊苔野淨籬陰鷄犬竹叢疎
一關兼是和雲掩敢道門無卿相車

掉臂何妨入隱淪高賢應總貴全真次山有以稱聾叟
魯望兼之傳散人拂水遠天孤榜晚夾村微雨一溪春
不知圖畫誰名手狀取江湖太古民

孤山後寫望

水墨屏風狀總非作詩除是謝玄暉溪橋裊裊穿黃落
樵斧丁丁斫翠微返照未沉僧獨往長烟如淡鳥橫飛

南峰有客鋤園罷閒倚籬門忘却歸

孤山寺端上人房寫望

底處憑闌思眇然孤山塔後閣西偏
陰沉畫軸林間寺零落碁枰葑上田
秋景有時飛獨鳥夕陽無事起寒烟
遲留更愛吾廬近祇待重來看雪天

孤山寺

雲峰水樹南朝寺祇隔叢篁作並鄰
破殿靜披蘂白古齋房閒試酪奴春
白公睡閣幽如畫張祜詩牌妙入神

乘興醉來拖木突翠苔蒼蘚石磷磷

西湖

混元神巧本無形匠出西湖作畫屏春水淨於僧眼碧
晚山濃似佛頭青藥爐粉堵搖魚影蘭杜烟叢閣鷺翎
往往鳴榔與橫笛細風斜雨不堪聽

平居遣興

有甚餘閒得解嘲高慵時把几程敲卑致晚鳥沉幽語
歷剌烟篁露病梢草野交遊披褐見神仙書吏點朱抄

皇朝不是甘逃遁爭向心如許與巢

池陽山店

數家村店簇山旁下馬危橋已夕陽驚鳥忽衝谿靄破
暗花閒墜塹風香時間盤泊心猶戀日後尋思興必狂
可惜迴頭一聲笛酒旗摇曳出疎簷

易從上人山亭

湖上汪灣隔數峰籬門和竹夾西東閒來此地行無厭
又共吾廬看不同靈隱路歸秋色裏招賢庵在鳥行中

屏風若欲相攙見合把巉巖與畫工

過蕪城縣

詩中長愛杜池州說着蕪城是勝遊
山掩縣城當北起渡衝官道向西流
風捎檣碇網初下雨擺魚薪市未收
更好兩三僧院舍松衣石髮鬬山幽

無為軍

掩映軍城隔水鄉人烟景物共蒼蒼
酒家樓閣搖風旆茶客舟船簇雨檣
殘笛遠砧聞野墅老苔寒檜看僧房

懶為躬耕詠梁甫吾生已是太平民

春陰

似雨非晴意思深宿醒牽率卧春陰苦憐燕子寒相並
生怕梨花晚不禁薄薄簾幃欺欲透遙遙歌管壓來沉
北園南陌狂無數只有芳菲會此心

山園小梅二首

衆芳搖落獨暄妍占盡風情向小園疎影橫斜水清淺
暗香浮動月黃昏霜禽欲下先偷眼粉蝶如知合斷魂

幸有微吟可相狎不須檀板共金尊

剪綃零碎點酥乾向背稀稠畫亦難日薄縱甘春至晚
霜深應怯夜來寒澄鮮祇共鄰僧惜冷落猶嫌俗客看
憶着江南舊行路酒旗斜拂墮吟鞍

又詠小梅

數年閒作園林主未有新詩到小梅摘索又開三兩朶
團欒空遠百千迴荒隣獨映山初盡晚景相禁雪欲來
寄語清香少愁結為君吟罷一銜杯

梅花

吟懷長恨負芳時為見梅花輒入詩
雪後園林纔半樹水邊籬落忽橫枝
人憐紅艷多應俗天與清香似有私
堪笑邊人亦風味解將聲調角中吹

小園煙景正淒迷陣陣寒香壓麝臍
湖水倒窺疎影動屋簷斜入一枝低
畫名空向閒時看詩客休徵故事題
慚愧黃鸝與蝴蝶祇知春色在桃溪

杏花

蓓蕾枝梢血點乾粉紅腮頰露春寒不禁烟雨輕歌着
祇好亭臺愛惜看偎柳傍桃斜欲墜等鶯期蝶猛成團
京師巷陌新晴後賣得風流更一般

贈胡明府

一琴牢落倚松窓孤澹無君得趣長謁廟有時封縣版
坐衙終日着公裳為收牌印教村僕偶檢圖書見古方
徵足稅錢人更靜卻搗吟策立秋廊

寄傅霖

葛蔓烟枯束六經
高廉渾與昔賢停
黃牙稚子跨牛種
白眼山人識劒形
寒睡草旁林酒壯
曉思河曲雨槎腥
傳聞曾說平生事
不要清朝夢武丁

寄太白李山人

顏如童子髮如鰲
卜築深當太白西
身上祇衣麤直掇
馬前長帶古偏提
鷗鵬懶擊三千水
龍虎閒封六一泥
幾獨枕肱人迹外
半窓松雪論天倪

春日寄錢都使

桃花枝重肉紅垂
萱草抽苗抹綠肥
正語暖鶯風細細
著雙寒燕雨稀稀
亭臺物景兼飄絮
宅院時情漸夾衣
拍背挾肩行樂事
不甘離索向芳菲

寄題歷陽馬仲文水軒

構得幽居近郭西
水軒風景獨難齊
烟含晚樹人家遠
雨濕春蒲燕子低
紅燭酒醒多聚會
粉牋詩敵幾招攜
旅遊今日堪搔首
搖落山城困馬啼

春暮寄懷曹南通守任寺丞

中
行

跌蕩情懷每事同十年曹社醉春風彈弓園圃陰森下
碁子廳堂寂靜中赤脚我猶無一婢黑頭君合作三公
江湖今日還勞結日送歸飛點點鴻

復賡前韻且以陋居幽勝詫而誘之

畫共藥材懸屋壁琴兼茶具入船扉秋花挹露明紅粉
水鳥衝烟濕翠衣石磴背穿林寺近竹烟橫點海山微
百千幽勝無人見說向吾師是洩機

孤山隱居書壁

山水未深猿鳥少此生猶擬別移居直過天竺溪流上
獨樹為橋小結廬

池上作

簇簇菰蒲映蓼花水痕天影蘸秋霞分明似箇屏風上
飛起鷓鴣一道斜

竹林

寺籬斜夾千梢翠山磴深穿萬籜乾却憶貴家廳館裏
粉牆時畫數莖看

葑田

淤泥肥黑稻秧青
濶蓋深流旋旋生
擬倩湖君書版籍
水仙今佃老農耕

易從師山亭

林表秋山白鳥飛
此中幽致亦還稀
西村渡口人烟晚
坐見漁舟兩兩歸

秋江寫望

蒼茫沙觜鷺鷥眠
片水無痕浸碧天
最愛蘆花經雨後

一蓬烟火飯漁船

秉公橋作

晚峰橫碧樹梢紅數榜漁罾水影中憶得江南曾看著

巨然名畫在屏風

巨然僧尤妙山水

初夏

乳雀啁啾日氣濃雉桑交影綠重重秧田百畝鵝黃犬
橫策溪村屬老農

秋日含山道中迴寄歷陽希然山人

村落人家摠入詩下驢盤薄立多時霜陂一掬清於鑑
漱着牙根便憶歸

送易從師還金華


吟卷田衣歲向殘孤舟夜泊大江寒前巖數本長松色
及早歸來帶雪看

自作壽堂因書一絕以誌之

湖上青山對結廬墳前脩竹亦蕭疎茂陵他日求遺稿
猶喜曾無封禪書

春日懷歷陽後園遊兼寄宣城天使

昔年行樂伴王孫事盡清狂是後園
一榻竹風橫懶架半軒花月倒頑盆
佳人暗引鷺言語芳草閒迷蝶夢魂
今日淒涼舊春色可堪烟雨近黃昏



宋詩鈔卷十三

欽定四庫全書

集部
宋詩鈔卷十四

詳校官中書臣賈鉞

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷十四

內閣中書舍人吳之振編

石介但徠詩鈔

石介字守道兗州奉符人年二十六舉進士甲科為
鄆州觀察推官歷官至國子監直講慶厯中進用韓
范富杜諸臣介躍然喜曰此盛事也雅頌吾職其可
已乎乃作慶厯聖德詩直指大臣分別邪正詩出泰

山孫明復曰子禍始于此矣以是為人所擠杜祁公
韓魏公俱薦之拜太子中允直集賢院尋卒于家怒
之者謂其詐死北走契丹請斲棺驗之幸不許所為
詩文皆根抵至道排斥佛老及姦臣宦女庶幾聖人
之徒魯人稱為徂徠先生因以名其集永叔詩云問
胡所專心仁義丘與軻揚雄韓愈氏此外豈知他尤
勇攻佛老奮筆如揮戈又云金可爍而銷玉可碎非
堅不若書以紙六經皆紙傳但當書百本傳百以為

千或落于四夷或藏在深山待彼謗焰熄放此光芒
懸今讀其詩嶙峋硤礪挺立千尋溫厚之意存于激
直得見風人之遺然正學忤時直道致黜千古一轍
其可哀也

慶厯聖德頌

三月二十一日大昕皇帝御紫宸殿朝百官相得象
殊拜竦樞密使夷簡以司徒歸第二十二日制命昌
朝參知政事弼樞密副使二十六日勅除脩靖素並

充諫官四月八日皇帝御紫宸殿朝百官衍樞密使
仲淹琦樞密副使乃用御史中丞拱宸御史邀御史
平諫官脩靖十一疏追竦樞密使勅十三日勅又除
襄為諫官天地人神昆蟲草木無不歡喜皇帝退姦
進賢發於至聰動於至誠奮於睿斷見於剛克陟黜
之明賞罰之公也上視漢魏隋唐五代凡千五百年
其間非無聖神之主盛明之時未有如此選人之精
得人之多進人之速用人之盡實為希濶殊尤曠絕

盛事在皇帝之德之功為卓犖瑰偉神明魁大古者
一雲氣之祥一草木之異一蹄角之怪一羽毛之瑞
當時羣臣猶且濃墨大字金頭鈿軸以稱述頌美時
君功德以為無前之休丕天之績如仲淹弼實為不
世出之賢求之於古堯則夔龍舜則稷契周則閎散
漢則蕭曹唐則房魏陛下有之諸臣亦皆今天下之
人望為宰相諫官者陛下盡用之此比雲氣草木蹄
角羽毛之異萬萬不侔豈可翻無歌詩雅頌以播我

君之休聲烈光神功聖德刻于琬琰流于金石告于
天地奏于宗廟存于萬千年而無窮盡哉臣實羞之
臣嘗愛慕唐大儒韓愈為博士日作元和聖德頌千
二百言使憲宗功德赫奕煒燁昭于千古至今觀之
如在當日陛下今日功德無讓憲宗臣文學雖不逮
韓愈而亦官於太學領博士職歌詩讚頌乃其職業
竊擬於愈輒作慶厯聖德頌一首四言凡九百六十
字文辭鄙俚固不足以發揚臣子之心亦欲使陛下

功德煒燧昭于千古萬千年後觀之如在今日也臣
不勝死罪臣賤無路以進姑藏諸家以待樂府之採
焉

於維慶厯三年三月皇帝龍興徐出闈闔晨坐太極畫
開闔闔躬攬賢英手鋤姦桮大聲颯颯震搖六合如乾
之動如雷之發昆蟲踣躅妖怪藏滅同明道初天地嘉
吉初聞皇帝蹙然言曰予父予祖付予大業予恐失墜
實賴輔弼汝得象殊重慎微密君相予久予嘉乃績君

仍相予至鏞斯協昌朝儒者學聞該洽與予論政傳以
經術汝貳二相庶績咸秩惟汝仲淹汝誠予察太后垂
勢湯沸大熱汝時小臣危言業業為予司諫正予門闥
為予京兆聖予讒說賊叛于夏汝往式遏六月酷日大
冬積雪汝暑汝寒同於士卒予聞辛酸汝不告乏予晚
得弼予心慰悅弼每見予無有私謁以道輔予弼言深
切予不克舜弼自笞罰諫官一年奏疏滿篋侍從週歲
忠力盡竭契丹忘義檮杌饕餮敢侮大國其辭慢悖弼

將予命不畏而懾卒復舊好民得食褐沙磧萬里死生
一節視弼之膚霜剝風裂觀弼之心鍊金鍛鐵寵名大
官以酬勞渴弼辭不受其志莫奪惟仲淹弼一夔一契
天實賚予予其敢忽並來弼予民無瘥札曰行汝來汝
予黃髮事予二紀毛禿齒豁心如一兮率履弗越遂長
樞府兵政無蹶予早識琦琦有奇骨其器魁梧豈視店
契其人渾樸不施剗剗可屬大事敦厚如勃琦汝副衍
知人予哲惟脩惟靖立朝讞讞言論礫礫忠誠特達祿

微身賤其志不怯嘗詆大臣亟遭貶黜萬里歸來剛氣
不折屢進直言以補予闕素相之後含忠履潔昔為御
史幾叩予榻至今諫疏在於箱匣襄雖小臣名聞于微
亦嘗獻言箴予之失剛守粹慤與脩儔匹並為諫官正
色在列予過汝言無鉗汝舌皇帝明聖忠邪辨別舉擢
俊良掃除妖魃衆賢之進如茅斯拔大姦之去如距斯
脫上倚輔弼司予調燮下賴諫諍維予紀法左右正人
無有邪孽予望太平日不逾浹皇帝嗣位二十二年神

武不殺其默如淵聖人不測其動以天賞罰在予不失
其權恭己南面退姦進賢知賢不易非明不得去邪惟
艱惟斷乃克明則不貳斷則不惑既明且斷惟皇之德
羣下踧踖重足屏息交相告語曰惟正直毋作側僻皇
帝汝殛諸侯危慄墮玉失舄交相告語皇帝神明四時
朝覲謹脩臣職四夷走馬墜鐙遺策交相告語皇帝神
武解兵脩貢永為屬國皇帝一舉羣臣懾焉諸侯畏焉
四夷服焉臣願陛下壽萬千年

汴渠

隋帝荒宴遊厚地剗為溝萬舸東南行四海困橫流義
旗舉晉陽錦帆入揚州揚州竟不返京邑為墟丘吁哉
汴渠水至今病不瘳世言汴水利我為汴水憂利害我
豈知吾試言其由汴水濬且長汴水湍且道千里瀉地
氣萬世勞人謀舳艫相屬進餽運曾無休一人奉口腹
百姓竭膏油民力輸公家斗粟不敢收州侯共王都尺
租不敢留太倉粟我我冗兵食無羞上林錢朽貫樂官

求要優吾欲塞汴水吾欲壞官舟請君簡賜予請君節
財求王畿方千里邦國用足周盡省轉運使重封富民
侯天下無移粟一州食一州

麥熟有感

癸酉
中作

去年經春頻肆赦拜赦人忙走如馬五月不雨麥苗死
赦貧不能活窮寡今年經春無赦書十日一雨及時下
五月麥熟人民飽一麥勝如四度赦吾願吾君與吾相
調和陰陽活元化陰陽無病元氣活風雨調順苗多稼

使夢長熟人不饑敢告吾君不須赦

讀詔書

乙亥
中作

關中有山生虎狼虎狼性尅不可當去歲食人十有一
無辜被此惡物傷守臣具事奏聖帝聖帝讀之惻上意
乃詔天下捕虎狼意欲斯民無枉死吾君仁覆如天地
只知虎狼有牙齒害人不獨在虎狼臣請勿捕捕貪吏

三豪詩送杜默師雄

并序

本朝八十年丈人為多若老師宿名不敢論數近世

作者石曼卿之詩歐陽永叔之文辭杜師雄之歌篇
豪於一代矣師雄學於予辭歸作三豪詩以送之

曼卿豪於詩社壇高數層永叔豪於辭舉世絕儔朋師
雄歌亦豪三人宜同稱曼卿苦汨沒老死殿中丞身雖
埋黃泉詩名長如水永叔亦連蹇病鸞方騫騰四海讓
獨步三館最後登師雄二十二筆距獐如鷹才格自天
來辭華非學能迴顧李賀輩麤俗良可憎玉川月蝕詩
猶欲相憑凌曼卿苟不死其才堪股肱永叔氣甚閑用

之王道興師雄子勉旃勿便生驕矜

贈張績禹功

李唐元和間丈人如蠡起李翱與李觀言雄破姦宄並
郊及張籍詩苦動天地持正不退讓子厚稱絕偉元白
雖小道爭名愈弗已卒能霸斯文昌黎韓夫子吾宋興
國來丈人如櫛比黃州才專勝漢公氣全粹晦之號絕
羣平地走虎兕謂之雖駁雜亦文中騏驎白植洎盧震
江沱自為水朱巖兼孫僅培樓對獄峙卒能霸斯文河

東柳開氏嗟吁河東沒斯文乃屯否汨汨三十年淫哇
滿人耳粵從景祐後大儒復唱始文人如麻立縱縱攢
戰騎徂徠山磊砢生民實頑鄙容貌不動人心膽無有
比不度蹄涔微直欲觸鯨鯉有慕韓愈節有肩柳開志
今讀禹功文矛戟寒相倚寶光千里高飛出破屋裏龍
音萬丈長拔出重淵底雷霆皆藏身日星皆失次我慙
年老大才力漸衰矣禹功氣奔壯今方二十二前去吾
之年猶有十四歲今讀禹功文魂魄已驚悸更加十四

年世應絕儔類卒能霸斯文吾恐不在己禹功幸勉旃
當仁勿讓爾

西北

乙亥
中作

吾嘗觀天下西北險固形四夷皆臣順二鄙獨不庭吾
君仁秦厚曠歲稽天刑禍勢遂滋大震動如雷霆漸聞
頗驕蹇牧馬附郊垆吾恐患已深為之居靡寧堂上守
章句將軍弄娉婷不知思此否使人堪涕零

乙亥冬富春先生以老儒醇師居我東齊濟北張

洞明遠楚宮李溫仲淵皆服道就義與介同執
弟子之禮北面受其業因作百八十二言相勉
鳳皇飛來衆鳥隨神龍遊處羣魚嬉先生道德如韓孟
四方學者爭奔馳濟北張洞壯且勇楚丘李溫少而奇
二子磊落頗驚俗泰山石介更過之三人堂堂負英氣
胸中拳拳蟠蛟螭道可服分身可屈北面受業尊為師
先生晨起坐堂上口諷大易春秋辭洪音琅琅響齒牙
鼓橫孔子興宓義先生居前三子後恂恂如在汾河湄

續作六經豈必讓焉無房杜廊廟資吁嗟斯文故已久
天生吾輩同扶持二子勉旃吾不隋先生大用終有時
當以斯文施天下豈徒玩書心神疲

過魏東郊

全魏地千里雄大視區宇黃河為血脉太行為筋膂地
靈育聖賢土厚含文武堂堂柳先生生下如猛虎十三
斷賊指聞者皆震怖十七著野史才俊凌遷固二十補
亡書辭深續堯禹六經皆自曉不看注與疏述作慕仲

淹文章肩韓愈下唐二百年先生固獨步投篇動范杲
落筆驚王祐四方交豪傑羣公走聲譽一上中高第數
年編士伍五命為御史連出守方土事業週舉夔才能
堪相輔鳳皇世不容衆鳥競嘲訴獄中饑不死特地生
爪距鵓貅十萬師盟津直北渡塞上諸猛將低頭若首
鼠渴憶海為漿饑思鼈為脯兩手擎人肝大牀橫斗肚
一飲酒一石賊來不怕懼帳下立孫吳樽前坐伊呂笑
談韜鈴間出入經綸務祇氛恨未掃獻策言可擄幽州

恨未復上書言可取好丈有太宗好武有太祖先生文
武具命今竟不遇死來三十載荒草蓋墳墓四海無英
雄斯文失宗主豎子敢顛狂黠戎敢慢侮我思柳先生
涕汨落如雨試過魏東郊寒鴉啼老樹丈夫肝膽喪真
儒魂魄去瓦石固無情為我亦慘沮

蜀道自勉

潮陽障烟黑去京路八千吏部有大功得罪斥守藩朝
衝江霧行夜枕江濤眠蛟蜃作怪變時時攀船舳魚龍

吐火焰往往出波間故為相恐怖倏忽千萬端道在安
可却處之自晏然我乏尺寸効月食二萬錢自請西南
來此行非竄遷蜀山險可升蜀路高可緣上無嵐氣蒸
下無波濤翻步覺閣道穩身履劔門安惟懷吏部節不
知蜀道難

聞子規

月上半峰峰樹碧子規啼苦月無色壯士耳邊都不聞
兒女眼中淚自滴古人出處非關身處分事親出事君

服勤至死不敢倦避勞擇逸豈所聞我看蜀道誠為難
嗟爾子規何云云王遵九折竟叱馭班超萬里圖立勲
乘危蹈險盡臣節二人至今揚清芬我本魯國一男子
少小氣志凌浮雲精誠許國貫白日有心致主為華勲
位卑身賤難自達滿腹帝典與皇墳有時憤懣吐一言
小人謗議已紛紛宰相寬容天子慈八年之中三從軍
從軍官清吾何苦嘉州路遠爾勿語地不為我易其險
我豈守道不能固子規子規漫啼絕斷無清淚灑向汝

哀隣家

隣家不選醫醫無救病術朝一醫工入暮一醫工出有
加而無瘳皇皇不安室吁嗟鄰翁愚子為病者恤醫醫
一日更千人盲藥何能療沉疾

觀碁

人皆稱善奕伊我獨不能試坐觀勝敗白黑何分明運
智奇復詐用心險且傾嗟哉一枰上奚足勞經營安得
百萬騎鐵甲相磨鳴西取元昊頭獻之天子庭北入強

鄰域縛其主南行東逾滄海東射破高麗城南趨交趾
國蠻子與櫬迎盡使四邊臣歸來告太平誰能憑文楸
兩人終日爭

贈劉中都

吾登泰山上下視何紛紛彼角而走者孰為磨與磨彼
茁而生者孰為蕭與芸伯樂不復出駑驥終同羣下和
不再生珉玉將誰分吁哉劉中都高標凌浮雲諸侯不
薦士外府不策勲冉冉趨黃綬勤勞徒爾云我媿勢力

小不能叫吾君勿改芳蘭性林深須自薰勿隱冲鶴聲
天高當自聞

感事

吾嘗觀中夏地平如砥石幅員數萬里車馬知轍迹帝
宅居土中紫垣當辰極長江斷其南絕塞經其北東海
西流沙天為限夷狄三代千餘年天子雖務德實以險
為恃四夷皆潛匿漢唐德稍衰地勝豈殊昔暫來還亟
去不敢窺城壁石晉一失謀六州淪異域天地破局鏑

山川無阻阨貽爾子孫患固知非遠策桓桓周世宗三十纂瑤歷一歲破東河劉崇喪精魄再歲復秦鳳不庭自柔格三歲出南狩王師拯焚溺江北十四州取之如卷席四歲征關南曾不發一鎬三州相繼降德聲暢蠻貊李昇請臣妾錢鏐修貢職帝欲因兵鋒乘勝務深擊直取幽州城拓土開疆場重收虎北口復關閉寇賊是時戰屢捷六軍氣吞敵平吳如破竹成功在頃刻惜哉志不就暴疾生中夕帝宋承大寶聲名發丕赫全蜀獻

土地舉吳上圖籍荆潭與甌閩助祭來匍匐開城納江
俘御樓受晉馘區內一正朔六州獨割剔憤憤柳崇儀
才宏包旦爽生長在河朔耳目熟金革旗鼓朝治兵酒
殺夜結客握臂說心誠倒囊推金帛客以豪傑士遇侯
頗感激往來達厥誠生死願効力萬德納我說洞然絕
嫌隙事成已有萌侯去何云亟豪傑夜空回帳中屢嘆
息我覽此二事天意終難測撫卷一感傷兩睫淚潛滴

安道登茂材異等科

嘗言春官氏設官何踞蹠屑屑取於人辭賦為程約一字競新奇四聲分清濁矯矯遷雄才動為對偶縛恢恢晁董策亦遭聲病落每歲棘籬上所得多浮薄嗟哉浮薄流不知王霸略六經掛東壁三史束高閣瑣瑣事雕篆區區衍述作隨行登一第謂身翥寥郭趨衆得一官謂身縻好爵棲棲咫尺地燕雀假安託汲汲五斗米鴈鷺資飲啄壯哉張安道少懷夫子學三就禮部試不肯露頭角恥用衆人遇羞將一賦較甘心塌翼歸志懷本

卓犖三賢文章師

大參宋公副愷蔡公計相范公連章稱薦

儒林推先覺百

鳥聲啾啾獨能辨
鸞驚玉石方混混
獨能識至璞薦之
于天子此材堪輪
桷遂得望清光三
接近帷幄僚友視
萬乘器宇誠嶽嶽
願乞數刻景古今
可揚權縱橫三千
言得雋如奪槩上
下馳皇王周旋騁
禮樂遠推災異源
上究星文錯直言
補王闕危論針民
瘼天子覽其奏嘉
賞為嗟愕既嘆相
見晚且言同時樂
一命校秘書恩澤
優且渥追惜漢武
世仲舒道磽确再
念文宗朝劉蕡命

蹇剝有才無其時徒抱此誠慙吾君嗣丕基百王慙景
鑠萬物蒙休嘉四夷奉正朔賢良得其時才命不相虐
一謁乃大遇君臣無隔膜我賀吾君明取士得英卓我
賀吾道行逢時不蹉跎行願入廟廊鈞軸在掌握上使
斯文淳下使斯民樸五帝從可追三王豈為邈

感興

村居何所適種木樹桑梓田園繞家舍遠不逾十里款
段足乘騎代步而已矣但識畜駑駘安知有騏驥臘月

北風寒太行山色紫君命急如火城頭見烽燧雪深馬
僵倒十夫扶不起軍法有明訓後期者誅死倚鞍思駿
骨撫轡念綠駟求之不可得敵觥滿眼淚旁聞負薪叟
竊語相譏刺居安常念危在險如處易臨難始求濟狼
狽徒勞爾有備則無患古人垂深旨平居無事時華厩
深祕遽善穀與豐草秣飼十廐吏驚駘飽相枕素食不
知愧伯樂能識馬每來如勸說飛兔與腰褭日牽在都
市為愛千金資貪恪不肯置今日臨艱難勞力自勉勵

又送從道

常欲飽暖天下人其道未得一寸施子有二親皆七十
糠覈不充常寒饑昨日訪我破屋下具鷄一隻酒一卮
子起却盤筋不舉吾親未審曾食之對我噓噓涕泗下
孝子之心直可悲子固與我同一體相間豈復有毛皮
顧子之親則吾親吾親凍餒無奈何飽暖天下心徒為
送子出門成此詩

偶作

晉公平淮西兵出速如神崇韜伐西川六十日請臣大
祖初受命諸侯未盡賓蜀廣號敵國荆潭為疆隣王師
討有罪不聞逾十旬元昊誠螻蟻有地長一畛詎足污
斧鉞尋當投荆榛是何逾歲月務行含貸仁豈茲將帥
間迫無晉公倫張旗發一號豈無李處耘提戈出一戰
豈無王全斌容茲盈寸蟹蕩漾於流津平生讀詩書胃
中貯經綸薄田四五畝甘心耕耨勤倚鉏西北望涕淚
空沾巾

送李唐病歸

春風汶水溫曉日徂徠寒之子銜病歸請予開一言予
知去病術為子陳大端予嘗學聖人試將道比論道病
非一日善醫惟孔韓賞罰絕于周孔筆誅其姦春秋十
二經王道復全完佛老熾于唐韓刀斷其根原道千餘
言生民復眠食道病由有弊邪偽容其間身病由有隙
風邪來相干子欲治斯道絕弊道乃存子欲治子身杜
隙身乃安此理近古鑒吾言有本源

蝦蟇

夏雨下數尺流水滿池泓蝦蟇為得時晝夜鳴不停幾
日飽欲死腹圓如瓶罌鉅吻自開闔頭項或縮盈時於
土坎間突出兩眼睛是何癡形骸能吐惡音聲嗟哉爾
肉膾不中為犧牲嗟哉爾聲羸不中和人情殊不自量
力更欲睥睨橫海之鱣鯨自謂天地間獨馳善鳴名萬
物聒皆聾不知鐘鼓欽欽雷霆闐闐應龍戢腦入海底
鳳皇舉翼摩青冥此時各默默以避蝦蟇鳴何時雨歇

水澤涸青臭泥中露醜形失水無能為兩脚不解行乾
渴以至死盡把枯殼填土坑

寄雷澤張從道

不知有凍死一室心恬如臘盡妻未褐天寒子讀書澆
風與世薄古道于時疎事事皆同我憶君春草初

訪田公不遇

主人何處去門外草萋萋獨犬睡不吠幽禽閒自啼老
猿偷果實稚子弄鋤犁日暮園林悄春風吹藥畦

蘇唐詢秀才晚學於予告歸以四韻勉之

憐我山中卧半年相伴吟道傳諸子後易得數文深費
或經年絕書猶盡日尋惜哉未終業親老忽霑襟

歲晏村居

歲晏有餘糧杯盤氣味長天寒酒脚落春近臙頭香菜
色青仍短茶芽嫩復黃此中得深趣真不羨膏粱

送奉符縣監酒稅孟執中借職

蜀主
之後

東西兩處各天涯去國還鄉喜又嗟鄒嶧山藏孟子宅

自言孟軻後

海棠花落蜀王家深知周道非彝酒可罪唐臣

乞稅茶三載此心無一事閒經絳帳日常斜

事退日就於明復先

生問道

予與元均永叔君謨同年登科永叔尋入館閣元

均今制策高第君謨後磨礪元均事業獨予驚

下因寄君謨

網羅當日得英雄文陣三人各立功海裏赤鯨疑有角
雲中騏驎欲追風尋聞館閣英聲出又見賢良大對通

亦說年來畜寄業蟪蛄何計逐飛鴻

寄元均

君為儒者豈知兵何事欣隨壁馬行
裴度樽前坐韓愈
趙成帳下立荀卿
禦戎誰道全無策
對壘寧妨下一枰
須信乾坤養不肖
年三十七卧柴荆

赴任嘉州初登棧道寄題姜潛至之讀易堂

我不從官君下第其間險易兩何如
連雲棧外四千里
讀易堂中一帙書
慈母含飴垂禿髮
先生懷道接茅廬

莫將清淚頻頻灑蜀道之難欲上初

左綿席上呈知郡王虞部

王與介前任同在雅陽

何事相逢悲喜并
倏然相別二周星
主人鬢髮無多白
幕客欄衫依舊青
目極同思故山斷
涕危共在異鄉零

階前綠竹雖嘈雜
不似南湖湖上聽

雅陽南湖宴游之所也

士廷評相會梓州

道視荀揚雖未至
分如管鮑已知深
一千二百日離別
五十六驛外相尋
重欲同君注周易
且來共我聽胡琴

月留屋角不下去似與清風憐苦吟

鄭師易秀才詩奔騰道壯殆有石曼卿學士風骨
作四韻以勉之

曼卿續得少陵絃絃絕年來又一年驚起聽君諷新句
灑如開集味遺篇一家氣骨疑無偶萬丈光芒欲拂天
好向風騷尤著意他時三箇地詩仙

留題敏夫隱居

幾迴到此尋逋客杯案蕭疎滋味長山飯半甌橡子熟

春蔬一筋木苗香四時泉石應無夏滿谷雲霞別是鄉
終待共君結鄰里竹邊相並兩間房

訪竹溪呈孟節兼有懷熙道

到頭泉石是吾家坐石聽泉日已斜一片青衫非富貴
千竿綠竹好生涯君曾覽照頭皆雪我試看書眼亦花
便好結為山伴侶教他夔益佐勲華

招張洞明遠

君言下第我西飛執手都門淚滿衣萬里得歸頭半白

經年相別道應肥火鑽欲遍龜難死竹實猶多鳳不飢
暫到東山慰愁抱春秋之學說深微

村居

幽居一畝枕溪稜堦下杉松纏古藤常愛園林深似隱
不嫌門戶冷如僧麥宜過社猶催種山近經秋却懶登
已把壯心閒頓置少年莫要苦相憎

燕脂板浣花牋寄合州徐文職方

合州太守髯將絲聞說歡情尚不衰板與歌娘拍新調

賤供狎客寫芳辭木成文理差差動花映溪光瑟瑟奇

名得只從嘉郡樹

燕脂木
嘉州出

樣傳仍自薛濤時

有薛濤賤

奇章

磊磊馳聲價江令翩翩落酒卮幾首詩成卷魚子

有魚子賤

誰人唱罷泣燕脂紅牙管好同牀置紫竹笙宜一處施

願助風流向樽席杏花況是未離披

司空圖有杏花辭
文頃在睢陽多命

之唱

送馮司理之任彭州

李白詩中蜀道難把詩試讀淚汎瀾江形詰曲千迴折

嶺路峻嶒萬屈盤登陟去年腰僅折追思今日鼻猶酸

予去年罷嘉州歸

此行君不同屯蹇五馬相知舊長官

彭牧與君常同

官

赴任嘉州待闕左綿七十日通判呂國博日相從

吟酌至嘉陽因成韻寄之

鼎來豈敢道能詩一見何因便解頤鄉國三千里離別
杯盤七十日相知送人江外馬馱妓垂釣寺中魚竭池
別後中秋又重九與誰賞月詠東籬

泥溪驛中作

嘉陵江自大散關與予相別二十餘程至泥溪偕予去因有是作

山驛蕭條酒倦傾
嘉陵相背去無情
臨流不忍輕相別
吟聽潺湲坐到明

宋詩鈔卷十四